



**Broj: 01-66/14**  
**Vareš, 27.02. 2014. godine**

**Z A P I S N I K**  
**s 15. sjednice Općinskog vijeća Vareš,**  
**održane 30.01. 2014. godine**

Zdravko Marošević – predsjedavajući Općinskog vijeća Vareš, otvorio je 15. sjednicu s početkom u 16,00 sati, u velikoj sali Općine Vareš.

Izvršena je prozivka vijećnika.

**Prisutni vijećnici:** Ismet Abdulahović, Boško Andrić, Zdravko Barkić, Mahira Brkić, Tajiba Brkić, Almir Ciriković, Asmir Čizmo, Zdenko Franjić, Emir Islamović, Kenan Kamenjaš, Demo Kevrić, Zdravko Marošević, Mario Mirčić, Safeta Muftić, Mato Pavić, Elvir Rožajac, Jasmin Salketić, Goran Selak i Nikola Šimić.

**Odsutni:** Nema

Pored vijećnika sjednici prisustvuju: Općinski načelnik – Avdija Kovačević, sekretar Općinskog vijeća - Leon Pavlović, pomoćnici općinskog načelnika, ispred Službe za privredu i finansije – Senad Mahmutović, poslanik u Skupštini ZDK – gosp. Fahrudin Brkić, komandir PS Vareš –gosp. Meho Bajrić i predsjednici političkih stranaka.

Sekretar OV Leon Pavlović izvijestio je Vijeće o realizaciji Zaključaka sa 14. sjednice OV održane 23.12.2013. godine. Na 14. sjednici OV donesena su dva (2) Zaključaka, realizacija istih je u toku s obzirom da nisu vremenski određeni. Postavljeno je šest (6) vijećničkih pitanja na koja su nadležni dostavili pismeni odgovor.

Općinski načelnik Kovačević Avdija u okviru aktualne problematike na području općine Vareš, izvijestio je prisutne da za današnju sjednicu nema novih informacija za Vijeće i javnost sa kojima već nisu upoznati. Zahvalio se svima na dosadašnjoj saradnji i pomoći, te dao komentar na rad Jedinственog općinskog organa Općine Vareš u 2013. godini. Zatražio je i zamolio sve vijećnike, ako imaju mogućnosti, da na bilo kojem nivou vlasti pokušaju kroz razgovore pomoći lokalnoj zajednici na realizaciji projekata.

**(Vijećnička pitanja)**

**Elvir Rožajac**

Upoznao je prisutne sa dostavljenim odgovorom koje se odnosi na ruševne objekte

1. Ponovo skreće pažnju i traži od nadležne Službe da se krajnje ozbiljno pristupi rješavanju problema ruševnih objekata u ul. Zvijezda?

Uputio je sugestiju PS Vareš da policijske patrole češće obilaze rubna područja općine Vareš, o čemu je dao i pojašnjenje.

### **Demo Kevrić**

Nije zadovoljan sa dostavljenim odgovorom na postavljeno vijećničko pitanje na 14. sjednici OV koje se odnosi na izvlačenje posipnog materijala na lokalne ceste gdje postoji potreba, o čemu je da i objašnjenje, te upoznao prisutne sa odgovorom.

2. Ponovo apeluje i traži da se izvuče posipni materijal na lokalne puteve?

### **Safeta Muftić**

Zamolila je da joj se odgovori na postavljena vijećnička pitanja, dostavljaju zajedno uz materijal za sjednice Vijeća.

3. Pitanje upućeno PS Vareš – kakvi su rezultati istrage vezani za otuđenje, odnosno krađu radijatora vlasništva Općine Vareš? Traži pismeni odgovor.

### **Mario Mirčić**

4. Da li će i kada početi sa radom područna ambulanta u Hrvatskom domu u MZ Pržiči?

### **Ismet Abdulahović**

5. Da li Centralna radionica plaća zakup Općini Vareš?
6. Da li privatna firma ART iz Kiseljaka plaća ikakvu pristojbu Općini Vareš, obzirom da dugi niz godina posluje na općini Vareš, ako ne plaća zašto je to tako?

### **Mahira Brkić**

7. U ime par mještana MZ Mijakovići postavila je pitanje Službi za prostorno uređenje i obnovu, odnosno-komunalno-građevinskom inspektoru – Da li je, i ako jeste šta, komunalno-građevinski inspektor poduzeo po pitanju problema kanalizacije koja je provedena kroz privatni posjed Fahrudina Ibrišimovića iz Mijakovića? Da li je sačinjen zapisnik sa lica mjesta, te da li je izdato bilo kakvo rješenje od gore navedene Službe po pitanju naprijed spomenutog problema? Ako nije, zašto nije i da li će se u skorije vrijeme pristupiti rješavanju ovog problema? O postavljenom pitanju dala je i obrazloženje.

### **Emir Islamović**

8. U ime građana MZ Budoželje traži da izlazak terenskog doktora bude svakih petnaest dana a ne svakih dvadeset i jedan dan? Pitanje se odnosi na JU Dom zdravlja Vareš.

Predsjedavajući OV stavio je na raspravu Zapisnik sa 14. sjednice OV.

Nije bilo primjedbi i predsjedavajući OV stavio je na izjašnjavanje Zapisnik sa 14. sjednice OV, te nakon izjašnjavanja vijećnika konstatuje da je **Zapisnik sa 14. sjednice OV jednoglasno usvojen.**

Predsjedavajući OV stavio je na raspravu prijedlog dnevnog reda za 15. sjednicu OV.

Za riječ se javio Općinski načelnik Kovačević Avdija i predložio dopunu dnevnog reda 15. sjednice sa tačkom 5. Prijedlog Odluke o prodaji stalnog sredstva – službenog putničkog motornog vozila. O predloženom prijedlogu dao je i obrazloženje.

Predsjedavajući OV stavio je na izjašnjavanje prijedlog Općinskog načelnika za dopunu dnevnog reda 15. sjednice, te nakon izjašnjavanja vijećnika konstatuje da je predloženi prijedlog **jednoglasno usvojen.**

Vijećnik Zdravko Barkić sugerisao je Vijeću da tačku 8. Izvještaj o radu PS Vareš s ocjenom stanja sigurnosti za 2013. godinu, Vijeće razmatra kao 2. ili 3. tačku dnevnog reda, s obzirom da je na sjednici prisutan komandir PS Vareš gosp. Meho Bajrić.

Predsjedavajući OV izjavio je da može prihvatiti prijedlog vijećnika Zdravka Barkića, te predložio da se više ne primjenjuje ovakva praksa, o čemu je dao i obrazloženje.

Vijećnik Emir Islamović zatražio je da se pod tačkom „Tekuća pitanja“ razmatra žalba gosp. Fatić Saliha sa Budoželja.

Predsjedavajući OV upoznao je prisutne da je spomenuta žalba dostavljena i Općinskom vijeću kao i Općinskom načelniku na znanje te da će se ona razmatrati pod tačkom „Tekuća pitanja“.

Predsjedavajući OV konstatovao je da će Vijeće razmatrati Izvještaj o radu PS Vareš s ocjenom sigurnosti u 2013. godini prije ostalih tački dnevnog reda 15. sjednici, bez izmjene rednog broja iste tačke u dnevnom redu.

Nije više bilo prijedloga i predsjedavajući OV stavio je na izjašnjavanje prijedlog dnevnog reda za 15. sjednicu OV sa predloženom dopunom, te nakon izjašnjavanja vijećnika konstatuje da je **jednoglasno usvojen s l i j e d e ć i**

### *D n e v n i r e d*

- 1. Prijedlog Izmjene i dopune budžeta/proračuna Općine Vareš za 2014. godinu.**
- 2. Prijedlog Odluke o prosječnoj konačnoj građevinskoj cijeni 1 m<sup>2</sup> korisne stambene površine na području općine Vareš za 2013. godinu.**
- 3. Prijedlog Odluke o raspodjeli sredstava za Klubove vijećnika političkih stranaka i vijećnika u Općinskom vijeću Vareš iz budžeta Općine Vareš za 2014. godinu.**
- 4. Prijedlog Odluke o raspisivanju Javnog oglasa za imenovanje člana Općinske izborne komisije Vareš.**
- 5. Prijedlog Odluke o prodaji stalnog sredstva – službenog putničkog motornog vozila.**
- 6. Prijedlog Rješenja o imenovanju člana Općinske izborne komisije Vareš.**

7. **Prijedlog Rješenja o imenovanju vršilaca dužnosti predsjednika i članova Skupština Javnih preduzeća i to:**
  - a), **Javnog komunalnog preduzeća d.o.o. Vareš**
  - b), **Javnog preduzeća „Vareš-stan“ d.o.o. Vareš**
  - c), **Javnog preduzeća „Veterinarska stanica“ d.o.o. Vareš**
8. **Prijedlog Programa rada Općinskog načelnika za 2014. godinu.**
9. **Izveštaj o radu PS Vareš s ocjenom stanja sigurnosti za 2013. godinu.**
10. **Izveštaj o realizaciji Programa rada Općinskog vijeća Vareš za 2013. godinu.**
11. **Tekuća pitanja.**

#### **Ad. 1.**

*(Prijedlog Izmjene i dopune budžeta/proračuna Općine Vareš za 2014. godinu.)*

Otvorena je rasprava u kojoj su učestvovali vijećnik Goran Selak koji je uputio pitanje predlagачu i zatražio pojašnjenje zašto je došlo do izmjene u iznosu za sufinansiranje Pučke kuhinje u odnosu na izglasano. U Prijedlogu Izmjene i dopune budžeta/proračuna za 2014. godinu naveden je iznos od 4.400 KM za Pučku kuhinju, a na 14. sjednici OV pod tačkom 2. kod razmatranja Budžeta općine Vareš za 2014. godinu, ovlašteni predlagач je prihvatio prijedlog o povećanju sredstava za Pučku Kuhinju, i izjavio da će sredstva za sufinansiranje Pučke kuhinje iznositi 5.000 KM.

U daljnjoj raspravi su učestvovali: ispred Službe za privredu i finansije Senad Mahmutović, predsjedavajući OV Zdravko Marošević, vijećnici Zdravko Barkić i Đemo Kevrić, te Općinski načelnik Avdija Kovačević koji je predložio da se **stavka za sufinansiranje Pučke kuhinje u iznosu od 4.400 KM poveća za iznos od 600 KM, tako da iznosi 5.000 KM.**

Predsjedavajući OV zaključio je raspravu i stavio na izjašnjavanje Prijedlog Izmjene i dopune budžeta/proračuna Općine Vareš za 2014. godinu sa izmjenom koja se odnosi na povećanje stavke za sufinansiranje Pučke kuhinje za iznos od 600 KM.

Nakon izjašnjavanja vijećnika predsjedavajući OV konstatuje da su sa predloženom izmjenom **jednoglasno usvojene**

***Izmjene i dopune budžeta/proračuna  
Općine Vareš za 2014. godinu.***

## **Ad.2.**

*(Prijedlog Odluke o prosječnoj konačnoj građevinskoj cijeni 1m<sup>2</sup> korisne stambene površine na području općine Vareš za 2013. godinu.)*

Komisija za statutarna pitanja i propise na 12. sjednici održanoj 21.01.2014 godine, jednoglasno je donijela slijedeći Zaključak:

- **Komisija nema primjedbi na Prijedlog Odluke, te je upućuje Vijeću na razmatranje.**

Predlagač nije imao dodatno obrazloženje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Prijedlog Odluke o prosječnoj konačnoj građevinskoj cijeni 1m<sup>2</sup> korisne stambene površine na području općine Vareš za 2013. godinu.

Nakon izjašnjavanja vijećnika predsjedavajući OV konstatuje da **je jednoglasno usvojena**

***Odluka o prosječnoj konačnoj građevinskoj cijeni 1m<sup>2</sup> korisne stambene površine na području općine Vareš za 2013. godinu.***

## **Ad. 3.**

*(Prijedlog Odluke o raspodjeli sredstava za Klubove vijećnika političkih stranaka i vijećnika u Općinskom vijeću Vareš iz budžeta Općine Vareš za 2014. godinu.)*

Komisija za statutarna pitanja i propise na 12. sjednici održanoj 21.01.2014 godine, jednoglasno je donijela slijedeći Zaključak:

- **Komisija nema primjedbi na Prijedlog Odluke, te je upućuje Vijeću na razmatranje.**

Predlagač nije imao dodatno obrazloženje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Prijedlog Odluke o raspodjeli sredstava za Klubove vijećnika političkih stranaka i vijećnika u Općinskom vijeću Vareš iz budžeta Općine Vareš za 2014. godinu.

Nakon izjašnjavanja vijećnika predsjedavajući OV konstatuje da **je jednoglasno usvojena**

***Odluka o raspodjeli sredstava za Klubove vijećnika političkih stranaka i vijećnika u Općinskom vijeću Vareš iz budžeta Općine Vareš za 2014. godinu***

#### **Ad. 4.**

*(Prijedlog Odluke o raspisivanju Javnog oglasa za imenovanje člana Općinske izborne komisije Vareš.)*

Komisija za statutarna pitanja i propise na 12. sjednici održanoj 21.01.2014 godine, jednoglasno je donijela slijedeći Zaključak:

- **Komisija nema primjedbi na Prijedlog Odluke, te je upućuje Vijeću na razmatranje.**

Predlagač nije imao dodatno obrazloženje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjanje Prijedlog Odluke o raspisivanju Javnog oglasa za imenovanje člana Općinske izborne komisije Vareš.

Nakon izjašnjanja vijećnika predsjedavajući OV konstatuje da **je jednoglasno usvojena**

***Odluka o raspisivanju Javnog oglasa za imenovanje člana Općinske izborne komisije Vareš***

#### **Ad. 5.**

*(Prijedlog Odluke o prodaji stalnog sredstva - službenog putničkog motornog vozila.)*

Otvorena je rasprava u kojoj je vijećnik Mario Mirčić predložio da se na osnovu ovog Prijedloga Odluke uradi Prijedlog Odluke o kupovini terenskog vozila.

Predsjedavajući OV je konstatovao da je predlagač prihvatio prijedlog i da će za jednu od narednih sjednica OV, predlagač pripremiti i dostaviti Vijeću na razmatranje Prijedlog Odluke o kupovini terenskog vozila.

Zaključena je rasprava i predsjedavajući OV stavio je na izjašnjanje Prijedlog Odluke o prodaji stalnog sredstva-službenog putničkog motornog vozila.

Nakon izjašnjanja vijećnika, predsjedavajući OV konstatuje da je **jednoglasno usvojena**

***Odluka o prodaji stalnog sredstva -službenog putničkog motornog vozila.***

#### **Ad.6.**

*(Prijedlog Rješenja o imenovanju člana Općinske izborne komisije Vareš. )*

Komisija za izbor i imenovanja na 8. sjednici održanoj 23.12.2013. godine, obavila je Intervju sa kandidatom Mineta Hrvat, te zaključila da je ista prema uspjehu obavljenog Intervjua ostvarila 35,7 bodova.

Komisija je obavila Intervju sa kandidatom Enida Islamović, te zaključila da je ista prema uspjehu Intervjua ostvarila 36,4 bodova.

Na osnovu uspjeha postignutog na Intervju, Komisija je sačinila rang listu i to:

1. Enida Islamović sa 36,4 bodova
2. Mineta Hrvat sa 35,7 bodova

Otvorena je rasprava u kojoj su učestvovali vijećnik Zdravko Barkić i predsjedavajući OV Zdravko Marošević.

Zaključena je rasprava i predsjedavajući OV stavio je na izjašnjavanje prijedlog kandidata za imenovanje člana Općinske izborne komisije prema rang listi, te nakon izjašnjavanja vijećnika konstatuje da je **jednoglasno kandidat Enida Islamović imenovana za člana Općinske izborne komisije Vareš i doneseno**

***Rješenje o imenovanju člana  
Općinske izborne komisije Vareš.***

***Ad. 7.***

*(Prijedlog Rješenja o imenovanju vršilaca dužnosti  
predsjednika i članova Skupština Javnih preduzeća i to:*

- a) Javnog komunalnog preduzeća d.o.o. Vareš,*
- b) Javnog preduzeća „Vareš-stan“ d.o.o. Vareš*
- c) Javnog preduzeća „Veterinarska stanica“ d.o.o. Vareš.)*

Nije bilo rasprave po ovoj tački dnevnog reda.

Predsjedavajući OV stavio je na izjašnjavanje Prijedlog Rješenja o imenovanju vršilaca dužnosti predsjednika i članova Skupštine Javnog komunalnog preduzeća d.o.o. Vareš.

Nakon izjašnjavanja vijećnika predsjedavajući OV konstatuje da je **jednoglasno usvojeno**

***Rješenje o imenovanju vršilaca dužnosti predsjednika i članova  
Skupštine Javnog komunalnog preduzeća d.o.o. Vareš.***

Predsjedavajući OV stavio je na izjašnjavanje Prijedlog Rješenja o imenovanju vršilaca dužnosti predsjednika i članova Skupštine Javnog preduzeća „Vareš-stan“ d.o.o. Vareš.

Nakon izjašnjavanja vijećnika predsjedavajući OV konstatuje da je **jednoglasno usvojeno**

***Rješenje o imenovanju vršilaca dužnosti predsjednika  
i članova Skupštine Javnog preduzeća „Vareš-stan“ d.o.o. Vareš.***

Predsjedavajući OV stavio je na izjašnjavanje Prijedlog Rješenja o imenovanju vršilaca dužnosti predsjednika i članova Skupštine Javnog preduzeća „Veterinarska stanica“ d.o.o. Vareš.

Nakon izjašnjavanja vijećnika predsjedavajući OV konstatuje da je **jednoglasno usvojeno**

***Rješenje o imenovanju vršilaca dužnosti predsjednika  
i članova Skupštine Javnog preduzeća „Veterinarska stanica“ d.o.o. Vareš.***

**Ad.8.**

*(Prijedlog Programa rada Općinskog načelnika za 2014. godinu.)*

Otvorena je rasprava u kojoj su učestvovali vijećnici: Elvir Rožajac koji je sugerisao da sve političke partije preko viših nivoa vlasti pokušaju iznaći rješenje da se građani općine Vareš mogu liječiti u Sarajevu, vijećnica Safeta Muftić tražila je pojašnjenje u vezi katastarskih općina, vijećnik Đemo Kevrić je apelovao da se državni praznici (1. mart i 25. novembar) obilježavaju u skladu sa Odlukom o načinu obilježavanja međunarodnih i državnih praznika, koju je donijelo OV Vareš.

U daljnjoj raspravi učestvovali su predsjedavajući OV Zdravko Marošević i Ermin Musa pomoćnik načelnika koji je dao pojašnjenje koje se odnosi na katastarske općine.

Zaključena je rasprava i predsjedavajući OV stavio je na izjašnjavanje Prijedlog Programa rada Općinskog načelnika za 2014. godinu.

Nakon izjašnjavanja vijećnika predsjedavajući OV konstatuje da je **jednoglasno usvojen**

***Program rada Općinskog načelnika za 2014. godinu.***

**Ad. 9.**

*(Izveštaj o radu PS Vareš s  
ocjenom stanja sigurnosti za 2013. godinu.)*

Predsjedavajući OV Zdravko Marošević:

Prelazimo .... na 9. točku, odnosno otvaramo 9. točku Dnevnog reda, Izvješće o radu Policijske stanice Vareš s ocjenom stanja sigurnosti u 2013. godini. Da li podnosilac ovakve izvješća ima potrebe za javljanjem. Nema. Otvaram raspravu po ovoj točki Dnevnog reda..... imal' neko za raspravu o stanju, dali ste zadovoljni – nezadovoljni, dodatnih pitanja, nepitanja.....gospodin Kevrić.

Vijećnik Đemo Kevrić:

Klub vijećnika BPS-a i izvršni odbor razmatrao je ovu tačku dnevnog reda. To je Izvještaj o radu Policijske stanice Vareš za 2013. godinu. Podaci k'o podaci. Dosta se odnosilo ovde podataka, što možda nije ni trebalo..., al nas je jedna konstatacija zainteresovala, i to na strani



10, kada se radi o teškim krađama iz poslovnih i privrednih subjekata. Pa ću je pročitati. Za period 01-12.2013. godine, znači, za komplet trinaestu godinu, evidentirano je sedam krivičnih djela teške krađe iz poslovnih i privrednih subjekata. Gospodo draga, očito se vidi, očito se vidi da štošta nedostaje iz privrednih subjekata, iz objekata, iz preduzeća. Ovde prikazano sedam krivičnih djela, ako su to toliko teška krivična djela, možda bi trebali i da znamo šta su, ali se pitamo, svaki dan se krađe, dobro nam je to svima poznato, pogotovo iz naših, tako da kažemo giganata, a ovde sam' prijavljeno sedam krivičnih djela. Ako smo mi u krivom, nek nam se kaže, a mislim da smo mi u pravu. Mislim da je ovo samo zalučivanje, bacanje maske, dalje, pa u tom pravcu bi želili da nam se pojasni, šta se to smatra pod krivičnim djelima teške krađe, ako znamo da se to i dalje otuđuju sredstva iz privrednih objekata.

Predsjedavajući OV Zdravko Marošević:

Zahvaljujem gospodinu Kevriću, gospodin Abdulahović, pa nek' se pripremi gospođa Safeta Muftić.

Vijećnik Ismet Abdulahović:

Ma evo, Đemo je malo naćeo, ali nije rek'o ključne stvari, da mi nismo apsolutno zadovoljni ovim Izvještajem. Zašto? Ljudi moji, kod nas se svašta dešava na području općine Vareš. Ako počnemo d...da radimo neke stvari, evo, idemo da vidimo, pokralo se ne znam kol'ko metara pruge, nikom ništa. Krađu se vodovodi, nikom ništa. Podnosili smo predstavke i žalbe, ovaj, na...na rad Policijske stanice, nikom ništa. Poslijepodne kada ode komandir Policijske stanice, onda je nešto drugo ovde. Ja sam prvo nezadovoljan zato što komandir nije odavde. Druga stvar, saznanja smo nekih da ovde ima policajaca koji rade u Policijskoj stanici koji su krivično gonjeni. Ako je to istina, tražimo od komandira Policijske stanice da nam to ovde javno kaže i molim posebno da ovo uđe u zapisnik, jer ćemo mi to pitanje proslijediti, naravno, do komesara i ministra MUP-a. Ako je to tako, nije čudo što se svašta dešava, dalje, ovaj izvještaj, nigdje se ne spominje droga. Mi gledamo na televiziji da se spominje droga, da se hapsi po Varešu. Jel' to, jel' to istina il' nije? Mi smo svi vidjeli na svim medijima da ima uhapšenih na području općine Vareš, što se tiče droge. Ako je to tako, mi moramo to znati, mi imamo djecu ovde koja nam žive. Ovi drugi ljudi koji ne žive ovde, njima je lakše. Međutim, ja bogami, ne želim da se upuštam u neki, ovaj, aj da kažem, vaspitački dio, al' ako je to istina, mi se moramo dobro pozabaviti ovde. Znači da nam ove institucije slabo rade. Ako je tačno ove, ovi navodi koje, koje, ovaj, s kojima mi raspolažemo mi..., mi stvarno nismo zadovoljni s ovim. Znači, Klub vijećnika BPS-a neće podržati ovaj izvještaj, s tim, što ćemo, ovaj, poslat, znači, da javno kažem da ćemo mi poslat, da ne kaže neko iz leđa se radi ovo-ono, nek' čuju svi da ćemo mi poslat javno upit ima li policijskih službenika u Policijskoj stanici Vareš da su krivično gonjeni i osuđivani. Ako je to tako, to je katastrofa. A mislim da je istina ovo. Evo toliko.

Predsjedavajući OV Zdravko Marošević:

Zahvaljujem gospodinu Abdulahoviću, imal' još neko? Ja, izvinjavam se, gospođa Safeta Muftić,..... pa nek' se pripremi gospodin Kamenjaš.

Vijećnica Safeta Muftić:

Pa evo, na..., izvinjavam se, imam problema malo s grlom. Na osnovu prezentirane analize, zaključak komandira Policijske stanice da je bezbjednosna situacija u 2013. godini na području općine zadovoljavajuća. Ja se slažem sa komandrom u tome, ali se ne slažem da je istom doprinijela policijska požrtvovanost, što ću i pojasniti u svom izlaganju. Na

prošlogodišnjoj sjednici, kada smo usvajali Izvještaj Policijske stanice, i kada smo u istom u rubrici droga imali pokazatelj nula, dakle, droge nije bilo na prostoru općine Vareš po saznanjima naše policije, tada je Načelnik općine ustao i svima nama ovdje pojasnio da droge zapravo ovdje ima. Građanima je poručio da čuvaju svoju djecu. Dva puta u prošloj godini, dakle, godini za koju se i podnosi ovaj Izvještaj, što je govorio i moj kolega Abdulahović, putem medija smo informisani da je SIPA izvršila pretres kuće jednog narko dilera u Varešu, dakle prvi puta, te da jedan od najvećih balkanskih narko dilera iz Vareša, drugi puta, znači upozorenje medija. Dakle, Načelnik je bio u pravu. Naša omladina također zna da u Varešu ima droge. Jedino naša policija kroz ovaj izvještaj tvrdi drugačije. Drugo, imam pouzdane informacije da se pol... policija ne očituje, odnosno da ne izlazi na teren po prijavi šumskih krađa, odnosno krađa drvnih sortimenata sa lagera radi daljnje preprodaje. Sigurna sam da su i ovi sortimenti nečija imovina, a da je osnovni zadatak policije da čuva našu imovinu i naše živote. Uz još neka saznanja, ovo su otprilike stavke koje će presuditi da li će Klub vijećnika SBB-a podržati ovaj izvještaj. A sad želim reći nešto što neće imati veze sa našom odli.. odlukom, ali je vezano za rad Policijske stanice Vareš. Ja prosto ne mogu vjerovati, a vezano za moje, moje vijećničko pitanje, dakle, da se mogla desiti krađa općinskih radijatora, smještenih u kino sali, dakle, tik uz zgradu Policijske stanice. Ako znamo da su radijatori kabasti predmeti koji se nisu mogli iznijet u cekeru, već u većem prevoznom sredstvu, mislim, to je moje mišljenje, a da niko od stanara, stanara okolnih zgrada nije primijetio niti čuo to prevozno sredstvo, s pretpostavkom da je moralo biti uključeno prevozno sredstvo, i da je isto to sredstvo, dakle, moralo proći ispred zgrade Policijske stanice, a da niti jedan policajac ne primijeti, a kamoli evidentira taj čin. To mene navodi da, na raznorazne sumnje i razmišljanja na koja svakako imam pravo i na koje mi niko ne može uticati. Ja ću iskoristiti ovu priliku i reći ću i sljedeće. I ja sam poput vas obišla mnoge gradove Bosne i Hercegovine pa i šire, al' nikad nisam vidjela osim ovdje da policajac koji raširi papir na haubi službenog vozila jede burek i u stavu raširenih nogu se zalijeva jogurtom, u sred glavne ulice. To nam govori da je nivo kulture, odnosno ponašanja pojedinih policajaca, dakle pojedinih policajaca, ispod granica primjerenog. Što se tiče ovog Izvještaja toliko. Ali bi zamolila Predsjedavajućeg da kada se iscrpi rasprava po ovoj tački dnevnog reda dozvoli pauzu od 5 minuta kako bi se usaglasili stavovi Klubova. Toliko.

Predsjedavajući OV Zdravko Marošević:

Zahvaljujem, samo na znanje, prije nego što se neko javi, na znanje vijećnicima da mi Izvještaj Policijske stanice primamo ka znanju, znači ne usvajamo, mi ćemo sa određenim, sa određenim zaključkom, i sa određenim preporukama. Ovaj ....., pa ćemo dati, normalno stanku, imate uvijek pravo tražiti, svaki vijećnik. Gospodin Kamenjaš.

Vijećnik Kenan Kamenjaš:

Pozdravljam prisutne. Ja sam upravo htio da kažem ovo što je, ovaj, Predsjedavajući iznio, da mi ovaj Izvještaj primamo k znanju, a što se tiče stava Kluba Stranke demokratske akcije, mi ćemo podržati ovaj Izvještaj. Smatramo da je rad Policijske stanice Vareš zadovoljavajući, dobar, da mi živimo u jednoj opštini koja je jako mirna, velika teritorija, mali broj policajaca, razuđenost opštine, sve su to problemi koje moramo uzeti u razmatranje kada posmatramo rad Policijske stanice, ali ja i moje kolege iz Kluba smo zadovoljni njihovim radom i podržati ćemo ovaj Izvještaj, a ipak malo i da smanjimo tenzije, mislim, ako i poredimo i druge opštine i čitamo u novinama i medijima, možemo vidjeti da se puno gorih i težih stvari dešava u drugim opštinama nego u našoj opštini. I kažem ponovo, živimo u jednoj mirnoj opštini i živimo jedan miran život, kada poredimo druge opštine, kako na području Ze-Do kantona, tako i na području Federacije i države. Toliko.

Predsjedavajući OV Zdravko Marošević:

Zahvaljujem. Gospodin Boško Andrić.

Vijećnik Boško Andrić:

Pozdravljam sve prisutne. Statistika je takva kava je, neumoljiva. Ima ovde svakako i ohrabrujućih stvari. Po.., po nama je indikativno na strani 5, ova donja tabela iznad koje stoji aktivnosti policije u oblasti bezbjednosti saobraćaja sprovedene u periodu 01-12.2013. godine. Ovdje se vidi da je ove godine..., prošle 2013, odnosno 2012. gotovo isti broj vozila i vozača koji je kontroliran, sedam i pesto trideset devet, sedam i petsto deset. Međutim, broj prekršajnih naloga se popeo sa 621 na 920 što je brojčano 299 više prekršajnih naloga ili u procentima cijelih 48%. Zatečeno vozača pod dejstvom alkohola, 2012. sedamdeset tri, 2013. devedeset tri, 27% više. Zatečeno vozača pod izrečenom zaštitnom mjerom zabrane upravljanja motornim vozilom, 2012. nula, 2013. pet. U procentima 500%. Zatečeno vozača koji su koristili mobitel tokom vožnje, 2012. dva, 2013. četiri, što iznosi 100%. Ovo su po nama prilično zabrinjavajući podaci oko kojih bi se trebala cijela .... društvena zajednica, da tako kažem, da pobrine i da se napravi jedna je li to psiho-sociološka analiza, znači, ovdje se ne radi o policiji, ko je pijan, pijan je, nije ih policija napila, ali su po nama prilično alarmantni podaci. Ovdje, normalno, nije prikazana, možda bi bila zanimljiva starosna struktura i tako dalje, može se odatle svašta izvodit, al' kažem ovo je prilično zabrinjavajuće i o ovome bi trebalo, što kaže, i općina i svi mi, i roditelji i tako dalje... Najlakše je reć' nije moje dijete, međutim oni su uvijek potencijalni problemi u prometu koji mogu izazvati svašta nešto. Znači, ovo nije na adresu policije, nego na adresu svih nas i zajednice koja bi trebala da, što kaže, povede računa zašto do ovoga dolazi. Možda imaju nekakvi... odgovarajući razlozi.

Predsjedavajući OV Zdravko Marošević:

Zahvaljujem. Da li još neko ima? Gospodin Barkić.

Vijećnik Zdravko Barkić:

Klub vijećnika SDP-a će prihvatiti ovaj Izvještaj, odnosno ..... k znanju, uz sugestiju, odnosno konstataciju da je bilo propusta, svakako, u radu Policijske postaje. Nema službe u kojoj nema, se ne dešavaju takvi propusti. Al' da ih baš hinjimo ovoliko, mislim da nisu zaslužili, jer mi imamo najmirniji grad u Bosni i Hercegovini. Krivična djela se ne mogu izbrisati gumicom. Ona se dešavaju svagdje. Ja mislim da na...sa.. ove brojke koje su pomenute ovdje, da je to, ako bi se napravila jedna detaljna analiza sa..., i poređenje sa drugim mjestima u Federaciji, ovaj, da bi podaci bili jako pozitivni. Druga je stvar što se dešavaju ti gafovi i primjedbe. Ja se slažem u mnogim stvarima. Droge u Varešu ima ko i u svakim drugim mjestima i zadatak je policije da istražuje i traga za dilerima, da ne truju djecu. I to im je zadatak i ja imam tu, ovaj, primjedbu, kao građanin Vareša. Ali moramo isto pogledati podatke da je od teških krivičnih djela, koja su u ovoj godini napravljena na području općine Vareš, od strane Policijske postaje Vareš otkrivena, otkriveni počinioci tih kaznenih djela u procentu 83%. Morate priznati ako ste imalo realni da je to dosta visok procenat i da tu ne bi smo trebali stavljati primjedbe Policijskoj postaji. U ... ovi statistički podaci koje je Boško maloprije čitao, vjerujte da su oni vjerojatno, ovaj, i puno bi bili drastičniji kad bi naša policija bila malo rigoroznija u kontroli saobraćaja. Međutim, svi mi učestvujemo u tom saobraćaju i svakako da je njihov zadatak i da procjene na licu mjesta ko ugrožava i na koji način saobraćaj. I da to oni, po meni, obzirom na podatke o saobraćajnim nesrećama na području općine Vareš dosta uspješno i korektno rade. Što se tiče ove krađe, ja prvi put čujem za tu krađu dole tih radijatora, to je stvarno bruka i sramota. I to se i ja slažem da je to velika

packa Policijskoj postaji. Ako niste dosad otkrili počinioce...?. Ja nisam znao za tu informaciju, ali krađu izvršiti u krugu 50 metara od Policijske postaje da niko ne primjeti. Nisu to, onaj, male stvari to je.... u pravu je koleginica, mi možemo, imamo pravo da posumnjamo da je neko i od ljudi koji su bili u tom trenutku na određenim pozicijama, odnosno na poslu da je suučesnik. Svjedoci smo da je vrlo često u takve krivična djela su uključeni i... odnosno umiješani i često i radnici određenih policijskih struktura. Prema tome, to je naša primjedba Policijskoj postaji, a što se tiče javnog reda mira, stanja sigurnosti na području općine Vareš, mi iz SDP-a smatramo da je to na dosta zadovoljavajućem nivou. Može se još i više. I svakako da treba od policije tražiti da maksimalno radi svoj dio posla.

Predsjedavajući OV Zdravko Marošević:

Zahvaljujem. Gospodin Mario.

Vijećnik Mario Mirčić:

Klub Hrvatske koalicije će primit k znanju ovaj Izvještaj. I smatramo da stoji ova konstatacija da je ocjena bezbjednosnog stanja, odnosno sigurnosnog na području općine Vareš zadovoljavajuća. Uvažavajući ove neke sugestije kolega, međutim kad ih iznosimo ovde, možda bi ipak bilo poželjno kad se govori, i malo stvari konkretizirati. Jer paušalno neke ocjene iznositi, sad jel' to bilo tako ili nije bilo, jel' bila krađa radijatora? Možda je to iznešeno, ljudi, u po bijela dana sasvim legalno, to niko sada ne zna. Sad iznositi takve podatke i činjenice, baš ovako u javnost je malo diskutabilno. Uglavnom eto to je naš stav, pa....

Predsjedavajući OV Zdravko Marošević:

Zahvaljujem. Imal' još neko? Ako nema, samo Načelnice dozvolite mi još da iskoristim svoje pravo, da jedno pitanje postavim gospodinu načelniku Policijske stanice. Više i radi javnosti, pogotovu s područja mjesne zajednice Vijaka, a zasigurno i ovih drugih mjesnih zajednica koje su rubne. U medijima je objavljeno da je na području Tuzlanskog kantona, odnosno na području ovamo.... Ribnice, znači to pripada, jel, Banovićima uhvaćena ta jedna grupa, kol'ko mi možemo izvještaja da se radi o grupi koja je operirala. Da li su policijske, policijski zapisnici, izvještaji sada na raspolaganju i tamo organima gonjenja i sudovima, jer zasigurno i kad kažemo mirno područje u jednim periodima zaista Vareš, ovaj u rubnom području nije baš miran, mislim kad se radi o takvim kriminalcima, i evo hvala Bogu da, da, da ipak na kraju svi dođu ruci pravde i da će se i ovi naši rubni, pogotovu mjesna zajednica Vijaka, gdje bila nekol'ko puta u, u napadu, ovaj, takvih kriminalaca, biti daleko sigurnija, sigurnija i mirnija. I malo da se osvrnem na vaša vijećnička pitanja, kad donesemo i prifatimo k znanju ovo i Načelniku koji može ovo prifatiti ove sugestije. Malo su i za mene teške optužbe, nisam siguran ko'lko se one mogu uzeti u obzir. Da li je bilo krađe, da li je to neko legalno, to treba svakako policija, ako je neko podnio prijavu da ispita, možda je legalno otišlo preko nekoga. I da li ima od policijskih službenika, odnosno policajaca, ko je krivično gonjen. Ja kol'ko poznam strukturu i rad policijskih... je nemoguće da neko bude krivično gonjen, a da nije proš'o kroz organe njihovih struktura disciplinskih, nekih drugih komisija, da, da Zenica dole sa, sa njihovim dole rukovodstvom, da za te stvari ne znaju, malo mi je to, malo mi to dođe teška optužba. Ovaj, možda je neko nešto uradio što prekrši svako neku radnu disciplinu, to, to ne znači da je problematično što radi, ali kao i ovaj neki kolega policijski koji jede u sred grada na policijskom autu. To svakako nije, ne pripada jednom ponašanju jednog policajca. Al' to ne znači da je on loš policajac, već jednostavno treba mu skrenuti pažnju. I dobro je ovo, što se kaže, i nadam se da će Policijska stanica u Varešu prifatiti sve vaše ove, unijeti sebi i pokušati neke stvari i ispitati, a svakako svojim radom i uticajom policijskim službenicima, odnosno djelatnicima, ovaj, sve upozoriti da policija mora bit uvijek na nivou

društvenih zbivanja i biti ogledalo grada. Ja se nadam da to jeste. Ovaj, i slažem se sa kolegama da ipak mi naspram negdje drugih trebamo biti zadovoljni sa stanjem koje imamo sigurnosno, ali u svakom slučaju uvijek može biti i bolje i tu uvijek treba težiti i ne treba se nikad mjeriti sa drugima. Evo toliko ću ja. A evo Načelnik je koliko znam..... Izvolite gospodine Abdulahović.

Vijećnik Ismet Abdulahović:

Evo ja ću kratko replicirat, mislim da nema smisla da se neko stavlja u ulogu advokata nečijeg. Ovaj, valjda mi vijećnici imamo pravo i mandat da pričamo ovde šta treba da se priča. Ne udaljavamo se od teme. Sad ovaj Mario Mirčić i gospodin Predsjedavajući Općinskog vijeća da budu, ovaj da oni ocjenjuju šta je dobro, šta nije. Mislim da to nije dobro za ukupnu situaciju. Ono što ću ja reći, ja ću reći i ja stojim iza toga, što god kažem. A ovaj ti, ovaj, gospodine Predsjedavajući nisi mentoran da ti ocjenjuješ, da li ja iznosim optužbe il' neistine, jer ja sam fino pit'o komandira Policijske stanice jel' istina to. I zamolit ću da se više, ovaj, ne uplićete u neke stvari koje ja budem govorio, a ne govorim u ime gospođe Muftić, u svoje lično ime govorim. Molim Vas, nemojte više o meni nikakve primjedbe. Ja što budem htio govorit, ja ću govorit. Ako se ja udaljim od teme, onda me prekinite, to Vam je pos'o. A Vi štitit neke stvari vako, nako. Ne trebate Vi to, ja znam šta treba govorit, šta ne treba. Toliko. Hvala.

Predsjedavajući OV Zdravko Marošević:

Zahvaljujem gospodinu Abdulahoviću. Ovaj, gospodine Abdulahoviću, ja kao predsjedavajući i svaki vijećnik imam pravo komentirati sve što drugi vijećnici govore i to je moje pravo vijećničko. A ja nisam opovrgnuo te informacije, već smatram da su takve informacije malo otežavajuće, da to, ako su takve, pretpostavljam da bi to reagirali organi koji djeluju unutar Policijske stanice i općenito u unutrašnjim poslovima. I, i čak mislim da to svaki građanin bi davno pokren'o, jer to ima pravo da upozori, da neki policajac... ja bi upozorio sudske i policijske stanice. Znači na to ja imam pravo. I neću da prihvatim kao vijećnik, a ni kao građanin takvo razmišljanje. Na to imam pravo. Ja samo to. A vaše pravo potpuno uvažavam i o tome nek se zabrinjava policijska stanica ako ima ona nešto kontra argumenat. Uopće me ne interesira šta će oni pokušati. Primit će k znanju i tako sam rekao. Imam pravo da razmišljam kao Vi o mom načinu razmišljanja, ja o Vašem. Mislim nema potrebe, nisam ništa želio loše reći, već jednostavno, ja jednostavno ne mogu prihvatiti takvu informaciju, a da ona već nije na jedan način, na jedan način neko reagir'o, ko je po zakonu dužan. Evo to jedino, ja tako mislim, ako je to tako, onda je katastrofa. Da, da jedan, da neko iz Zenice ne reagira, a da se, evo recimo, vodi. Eto ja to samo k'o građanin prihvaćam, ništa drugo. Gospodin Mario. Replika, jel'?

Vijećnik Mario Mirčić:

Kolegi Abdulahoviću, obzirom da se ovde vodi neka javna rasprava i da će vjerovatno, obzirom da je kolegica tražila stanku nakon provedene rasprave, neko ponudit određene zaključke, onda kad iznosimo neke činjenice da bi mi mogli donositi adekvatne zaključke, onda bi trebalo o tim stvarima konkretno govorit. Malo u rukavicama, jel' imal neko il' nema, ja za one slučajeve koje znam da su pravili greške kao djelatnici Policijske stanice, ti ljudi više ne rade u Policijskoj stanici. I za bilo šta, ako iznosimo ovde, što bi trebalo ovo tijelo da donese određene zaključke, dajte da onda budemo konkretni.

Predsjedavajući OV Zdravko Marošević:

Zahvaljujem. Gospodin Načelnik.

Općinski načelnik Kovačević Avdija:

Dakle, uz uvažavanje svih ovih diskusija koje su proistekle po ovoj tački dnevnog reda, ja sam u pripremi za ovaj današnji sastanak obavio niz jedan, širok, da tako kažem, spektar razgovora i nije on trajao samo danas, nego u zadnjih petnaest-dvadeset dana, jer je naime po radu, po planu i programu rada Općinskog vijeća predviđeno da se ova tačka dnevnog reda razmatra u redovnoj sjednici tokom mjeseca januara, jel tako? Dakle, prilikom našeg glasanja, uvažavajući ovo o čemu je gospođa Safeta Muftić govorila da, da treba da se napravi, ne znam, određena pauza i da se dogovorimo oko forme zaključaka. Mi trebamo, ovaj, ljudski, civilizovano, naravno, poslovnički, statutarno i tako dalje i u prvom redu zakonito da kažemo, odnosno da budemo svjesni jedne činjenice. A to je da ova materija apsolutno nije po zakonu nadležnost Općinskog vijeća Vareš. Mi trebamo ovakve ili slične informacije da primimo k znanju, da se o njima očitujemo, u tome smislu, vodeći pri tom računa, zaista da ovo nije naša nadležnost. Naša nadležnost jest u sljedećem, da budemo na vrijeme informisani, eventualno o problemima ukoliko ih ima u Policijskoj upravi ili Policijskoj stanici, već ne znam sad hijerarhijski tačno kako se zove. Ukoliko, recimo, lokalna zajednica sa stajališta svojih obaveza koje ima kao takva, u koordinaciji, u punoj koordinaciji sa lokalnom zajednicom treba da uradi ukoliko ona nije, recimo, izvršila neke svoje obaveze, da na vrijeme to prepoznamo i da onda sinhronizovanim aktivnostima, eventualno radimo na resocijalizaciji, odnosno na ..... na otklanjanju određenih problema koji se javljaju. Vidite nešto, ja bi bio krajnje nekorektan i bio bi krajnje, ovaj, nečovječan prema ljudima koji dole rade, ako ne bi kaz'o sljedeće. Kao Općinski načelnik, za ovih evo nepunih petnaest mjeseci, jel, kako sam tu, ja ne da imam dobru saradnju sa Policijskom stanicom, ja imam izvanrednu saradnju. I to je horizontalna saradnja koja se podrazumjeva. Dakle, ne postoji ni jedno jedino pitanje koje mi nismo otvorili, ne postoji ni jedna jedina informacija koju mi međusobno nismo razmijenili, a koja je u interesu opće sigurnosti svih građana općine Vareš. Vjerujte, ja iznosim svoju, dakle, ocjenu, da je saradnja fantastična sa kompletnim rukovodnim kadrom koji se nalazi dole u Policijskoj upravi. Ako diskutujemo već o pojedinim finesama, o pojedinim detaljima, trebamo pri tome voditi računa da je naša Policijska stanica potpuno neekipirana. Neadekvatno kadrovski ekipirana. Unutar te Policijske uprave ja mislim da sad fali najmanje sedamnaest, osamnaest izvršilaca koji su po pravilniku o unutrašnjoj organizaciji i sistematizaciji radnih mjesta Policijske stanice obavezni da budu popunjeni. I to nije krivica ove Policijske uprave, to nije krivica ovog Općinskog vijeća, naprosto, to je rezultat jednog općeg stanja i činjenice da Zeničko-Dobojski kanton nema dovoljno sredstava da bi mog'o da isfinansira kompletnu popunu. Naime, upražnjenja po osnovu tih radnih mjesta ne odnose se samo na Policijsku stanicu Vareš, nego se odnosi i na Olovo i na Brezu i na Visoko i na Zeničko-Dobojski kanton i o tome gospodin najmeritorniji možda da, da na ovu temu govori je gospodin Fahrudin Brkić kao kantonalni poslanik, kantonalni zastupnik, jer zna da je više puta, ovaj na tu temu bilo pričano na, i na Skupštini Zeničko-Dobojskog kantona. Mi smo ovdje nekol'ko puta kroz naše diskusije i kroz naše, i kroz naše priče konstatovali da u Varešu je, jel, javna tajna i općepoznata stvar da ima droge. Al' je činjenica da nema teških droga. Znače, i da organi sigurnosti, naši organi sigurnosti, dakle bez obzira dal' pripadali MUP-u Zeničko-Dobojskog kantona ili pripadali nekim drugim sigurnosnim službama odlično znaju i odlično barataju s imenima i prezimenima svih tih potencijalnih korisnika, dal' se radilo o lakim ili teškim drogama. I ljudi rade svoj pos'o. Ja prema informacijama koje imam, ali nisam ovlašten da izlazim u javni saobraćaj sa njima. Ja smatram, dakle prema tim informacijama, da se, da je to uvjetno kazano kontrolirano, kontrolirano s tim što postoje određene stvari koje se ne mogu sa stajališta postojećih zakona sankcionisati. Da bi smo u potpunosti to eliminisali. Nažalost tako je. Meni kao roditelju to

smeta. Kad je stanje sigurnosti saobraćaja, evo recimo navest ću jedan primjer. Možda je malo i duhovit, možda i smiješan. Pa ima i nas ovdje koji sjedimo. Pazite ima nas ovdje evo, koji sjedimo danas, koji popijemo koju kapljicu više, ne stegnemo pojas, zaustavi nas policija, oooo jesil' to ti Avdija, hajd' prolazi. A treb'o ga je kaznit. Ima nas. Pazite, to je jedna opća kultura i ne trebamo sad od toga praviti tabu temu. Ali generalno , generalno mislim da ova konstatacija gospodina Zdravka Barkića stoji. Vjerujte, malo je općina u Bosni i Hercegovini koje imaju opće stanje sigurnosti ko što ima ova općina. I jedni od najzaslužnijih ljudi za to su upravo ljudi rade, koji obavljaju dole taj svoj pos'o. I s te strane trebamo im čestitat. Ostaju dva pitanja, dakle ostaju dva pitanja na koja trebamo dobit odgovor. Trebamo dobit odgovor, al' to trebamo dobit civilizovano, demokratski i tako dalje i tako dalje. Ovo pitanje koje je gospodin Abdulahović postavio, da li ima ili nema toga. Ako ima, dajte da to u skladu s pozitivnim zakonskim propisima riješimo, ukoliko nema arhiviramo i završena stvar. I ovo drugo pitanje koje, ovaj, otvorila gospođa Safeta. Vi znate da sam ja na Vijeću vas informis'o, u martu čini mi se ili u aprilu prošle godine da je došlo do otuđenja četrnaest ili dvadeset osam grejnih tijela koja su unesena u Radnički univerzitet i da se na tome radi i vjerovatno će naši organi sigurnosti sa jednom cjelovitom akcijom doći do otkrivanja počinioca toga. I ne treba zaboraviti iz vida činjenicu. Ovdje je više godina, pazite, više godina su harale organizovane kriminalne bande, koje su otuđivale imovinu naših građana na području Krivaje, Vijake, Ligatića, Mižnovića, Ravni, Zubeta i jednom sinhronizovanom i koordiniranom aktivnošću, koju je vodio MUP Tuzlanskog kantona uz pomoć MUP-a Zeničko-Dobojskog kantona i djelom specijalnih jedinica iz Sarajeva definitivno i ta je banda raskrinkana. I to je strašno veliki uspjeh, to je strašno veliki uspjeh, jer se i na taj način na neki način na vraća, vraća sigurnost unutar policije. Ja vas pozivam da vrlo, vrlo, ovaj, afirmativno i vrlo odgovorno primimo ovu informaciju k znanju kao pozitivnu i da na neki način budemo ponosni na ovaj rad koji, koji nam Policijska stanica Vareš sa postojećim resursima, resursima pruža. Evo, hvala, toliko.

Predsjedavajući OV Zdravko Marošević:

Zahvaljujem Načelniku. Samo malo ću se dodat na Načelnika. Ovaj, svi smo mi svjesni, vjerojatno svi smo svjesni ovdje, da nismo mi nadležni. Al' zasigurno ako smo uvrstili u program, program, ovaj, rada Vijeća da dođe informacija o radu Policijske stanice, ja, ovaj, uzimam ovo sve što su vijećnici rekli samo da malo dobiju više saznanja o radu Policijske stanice. Znači, ništa mi ne odlučujemo, mi ništa, ovaj, nemamo pravo. Oni imaju svoj način rada i oni znaju kome odgovaraju, ali, evo, samo malo više i nekih nejasnoća kao što sam ja pit'o, znači, evo, čisto radi građana, ovi banditi koji su harali na našim rubnim područjima jel su i naš kriminalitet koji je učinjen na našoj općini biti uvršten u njihove optužbe koje će morati priložiti računa pred sudom, pred sudom u Zenici. Evo to je znači samo malo radi saznanja. Mi smo mala općina i ljudi se svi znaju i žele to čuti jel im to daje sigurnost življenja. Mislim da je to Policijskoj stanici izvrsna prilika da sa općinskih klupa, ovaj takvu jednu, jednu, ovaj, saznanja mogu poslati i da ljudi mogu mirno živjeti. Eto toliko. .... Može, može.... Safeta izvoli.

Vijećnica Safeta Muftić:

Htjela bi zamolit samo Stručnu službu Općinskog vijeća da kompletno ovu tačku, odnosno raspravu vezanu za ovu tačku dnevnog reda, da mi se nađe u zapisniku sa ove sjednice. Dakle prekucanu kompletnu raspravu ove tačke. Toliko.

Predsjedavajući OV Zdravko Marošević:

Zahvaljujem. Primljeno k znanju. Da li, pošto su vijećnici iscrpili, predlagač sada može nešto dati na ovo odgovora. Da bi ono što nismo znali, dobili.

Komandir PS Vareš Meho Bajrić:

Pozdravljam sve prisutne. Ne znam što se ove kolege smiju. To mi je slučajno ovako ispalo iz ruke. Ja ću se osvrnuti samo na par stvari. Došlo je ovdje do prozivanja, mislim da je to prozivanje lične prirode od strane pojedinih vijećnika. Pa bi to zamolio da se interesi lične prirode ne koriste u političke i druge svrhe. Ima i među nama ovdje svakakvih, ne bi nabraj'o, ne bi da idem od početka, da vidim...

Predsjedavajući OV Zdravko Marošević:

....Molim Vas gospodine Načelniče.... samo... na odgovore.....

Komandir PS Meho Bajrić:

... bolje da šutim. Što se tiče, ajd prvo ćemo oko ovo policajaca koji su krivično gonjeni, to je meni, prvi put čujem u svom životu da ima ijedan policajac koji radi u Policijskoj stanici Vareš da je krivično gonjen. Svi policijski službenici prošli su sve potrebne procedure od APTF-a pa dalje, i nema šanse da je ijedan policajac, ja kol'ko znam, možda negdje tamo da neko nešta zna, ja bi molio gospodina Abdulahovića da nam to rekne imenom i prezimenom, odnosno nek pošalje u Zenicu, nije bitno pitanje gdje ima, šta ima, ja to prvi put to od Vas čujem. Možda je kažnjavan po saobraćaju, negdje po pitanju toga, što se tiče po pitanju kriminaliteta taj policajac ne može raditi u policiji, bez obzira ko je, šta je. I ja i bilo ko drugi. Počeli smo o drogama ovdje, o drogama, čuli vi na televiziji, čuli na televiziji, i ja kad sam čuo na televiziji žile mi se zaledile i ja zino šta je sad, ko je sad iz Vareša, Bože sačuvaj. Nisam mog'o, te zovi SIPA-u, te zovi ovog, te zovi onog, ko je iz Vareša, ko je iz Vareša. Oni jedni viču pazi ko će izić iz ove kafane ujutru pa ćemo znati, pa vidi imal' toga, vidi imal toga, vidi imal toga. Međutim sasvim se ispostavilo nešto lijevo. Čovjek koji je samo fiktivno prijavljen u Varešu, živi u Baru, negdje dole, negdje gdje su ga u Trebinju uhvatili, nije čovjek, jel, ne znam jel dva puta bio u Varešu, samo ima ličnu kartu iz Vareša i nama je bacio ljagu na toliku drogu u Varešu koja nije na ovom terenu, niti je rasturana, niti donošena, niti je bilo šta. Znači, nemojte samo čula, kazala i hajmo pričati eto da napadamo nekoga i iz nekog drugog razloga. Ima droge, to je tačno. Nije tačno, ima, znate vi dobro i protiv kojih lica su podnešeni izvještaji prema tužilaštvu i tako dalje, i tako dalje. I neki dan smo podnijeli jedan izvještaj, ima izvještaja koji su u procesu i tako dalje. Ministarstvo MUP-a ZE-DO kantona vodi posebne istražne radnje po pitanju droga. I mi postupamo, baš, prije kol'ko možda mjesec dana, izvršili smo pretres tri lokacije. Nismo ništa našli. Ljudi odu sada u Sarajevo, odu u Brezu, Visoko gdje odu to upotrijebe i ovdje dođu takvi kakvi su ne donesu ništa. Neću ja reći da nema. Ima to opet negdje po čoškovima, a mi to tražimo, trudimo se kol'ko možemo. A eto molim i vas da nam i vi pomognete. Što se tiče radijatora, dame i gospodo, prvo od strane, nije od strane vas od strane inst... ovih pojedinaca iz opštine Vareš prisiljeni smo u Policijskoj stanici Vareš da odobrimo prolaz u Klub Campari, vozilima tamo vlasnika Camparija. Radijatori nisu nikud mogli izać nego kroz krug ispred stanice. Imaju sve kamere, imaju, nikud, nikud nije moglo, ispred stanice su prošli. To je tačno. I znamo kud su prošli i znamo ko je odveo, samo nismo ih našli. To je problem. Išli smo mi u pretrese, išli smo svašta. Al to je to. Tužiocu sad doneseš, kaže jest Meho Bajrić je ukr'o to, al' ako mu ne doneseš taj radijator, džaba. Radimo mi još i dalje na tome planu. Al vi ste nas odavde prisilili da pustim da prolaze kroz krug Policijske stanice. Kroz krug Policijske stanice, mi imamo naredbu od komesara i od ministra, poslije dešavanja u Bugojnu, da niko ne može prolaziti ni ulaziti ni bilo šta. Međutim, odavde, iz ove zgrade nam je naređeno, daj,daj, daj. Hajd' da ne pravimo nake probleme, uvijek smo tražili nekakve kompromise i uvijek je to tako bilo. I vozila su prošla, koja su prošla. Imamo mi snimak i kamere i ko je uš'o i šta je iš'o. Stepenice kuda su spuštene. Sedam je radijatora u pitanju. U ostalom vodimo istragu po tom pitanju, samo da ne mislite da je umiješana policija. Ja bi to volio to više od vas 99 puta da utvrdimo,



a ja mislim da ćemo utvrdit. Kažu policija ne izlazi na teren zbog krađe šum...zbog šumske krađe sa lagera. Gospodin direktor je tu, upravnik. Kad policija nije izašla, ja bi ga molio da kaže to, neću ja ništa govorit. Kad smo god zovnuti, jedino ako nas informišu bilo prije petnaest dana. Što ću ići gore. Prije petnaest dana bila krađa negdje, kakve fajde šta ću ja sada otić, mogu hodat, trošit gorivo bezveze i vidjet nema ništa. Evo direktore jesmol' poslali dopis i neki dan i uvijek. Imali sastanak, dogovorili, svaka krađa da se prijavi Policijskoj stanici da isti tren izađemo na uviđaj, da vršimo po tom pitanju dalje aktivnosti. Ja ne vidim tu, mislim, ne znam odakle vam te informacije dal' izlazimo, dal' ne izlazimo... Kažu sedam krađa samo. Pa šta ja mogu, hoćetel' da izmislimo još krađa? Eto hoćel' policija izmislit? I ovo je policija pronašla, razotkrila, što je prijavljeno, prijavljeno. Ne mogu ja izmišljat. Neću ja reći da nema krađa. A što je prijavljeno, mi smo postupili što smo mi mogli dokućit. Mi smo radili po tome pitanju. Pruga razotkrivena. Poćinioci uhvaćeni, predati tužilaštvu i tako dalje, i tako dalje. Ne vidim baš nekog razloga po pitanju toga da nam se nešto stavlja na teret. Što se tiće ove kriminalne grupe, koja je uhapšena u Tuzli, oni su poćinioci i ovih naših krivićnih djela u Vijaci i u rubnim dijelovima gore što su se dešavali. Uglavnom, danas smo mi imali sastanak neki u Zenici. Naše ministarstvo u saradnji sa Ministarstvom Tuzlanskog kantona treba da prikupi sve dokaze, odnosno oni su izvršili pretres tam objekata, lica i ostalo i našli su određene dokaze. I sad moramo da vidimo šta ima naše od toga. Ima li išta, pa ćemo onda biti uključeni. U stalnoj smo na vezi što se tiće toga... Dalje, ... što se tiće, kad sam već ovdje na govornici, iskoristio bi priliku da obavijestim građane, odnosno i vijećnike da je Zakon o držanju i nošenju oružja produžen još za šest mjeseci, odnosno do 30.06. i molimo sve građane koji nisu izvršili zamjenu oružnih listova, da to izvrše do 30.06.2014. godine. U protivnom, građani koji ne izvrše zamjenu oružnih listova, pisati će im se prekršajne prijave i ... oružje, bit će im oružje oduzeto. Također ću vas obavijestiti da je Federalni parlament donio Zakon o amnestiji objavljen u Službenim novinama Federacije 5/14, gdje svi građani mogu dobrovoljno da predaju oružje, minsko-eksplozivna sredstva i ostalo. Znaći mogu lovaćko oružje i ostalo po amnestiji registrovat, ukoliko ga neko ne potražuje. A za ostalo oružje, minsko-eksplozivno, da se obavijesti Policijska stanica, a mi ćemo obavijestiti Civilnu zaštitu koja će doći da izuzme minsko-eksplozivna sredstva i da ih uništi. Ja toliko, što se tiće mene, ako ima još pitanja.

Predsjedavajući OV Zdravko Marošević:

Zahvaljujem Naćelniku. Zahvaljujem. Gospodin zastupnik Brkić.

Zastupnik u Skupštini ZDK Fahrudin Brkić:

Uvaženo radno predsjedništvo, cijenjene vijećnice, vijećnici i naravno građani Vareša koji nas slušaju preko radija ja vas srdaćno pozdravljam, selamim. Evo ja ću kratko, samo da uzmem ućešće, jel, vezano malo za ovu temu oko izvještaja o radu Policijske stanice. Želio bih vas samo podsjetiti da je u Engleskoj oko policajca i generalno kao lićnost policajca izgrađen kult lićnosti. Znaći, toliko se vrednuje ta funkcija i cijeni. Ne daj Bože neko na policajca da tamo puca, da neko ubije policajca. I to se smatra nećim onaj, naj najtežim što se može desiti. Evo, ja bi volio da i u nas imamo jednu situaciju gdje policajci će biti daleko više vrednovani njihov rad, pa i kroz plaće, pa i kroz, znaći, odnos prema njima. S druge strane isto tako od policijskih službenika, mi kao građani, oćekujemo jedan profesionalan odnos i nadam se da će u narednom periodu do toga i doći. Evo kad govorimo o Izvještaju koji smo mi na Skupštini nedavno usvajali, o opštem stanju kriminaliteta na Zenićko-Dobojskom kantonu, konstatovano je u tom izvještaju da je stanje daleko bolje u 2013. godini nego u 2012. i Vareš je istaknut, zaista kao jedna mirna općina gdje nema, evo, ozbiljnijih, što se kaže krivićnih djela. Ove sitne stvari evo policija onako kako može i uspješno i rješava. Evo samo smo spomenuli i šumske krađe, mi imamo jednu saradnju u posljednje vrijeme tijasnu. ...Pardon.. Malo se razilazimo u naćinu kako, kako doći do rješanja da se ova situacija poboljša. Mi,

recimo, iz šumarije imamo uputstva, iz naše uprave da policiji dostavimo jednu prijavu ili informaciju. To je više informacija. Znači, kad se neko djelo šumske krađe desi, ona često zna doći sa zakašnjenjem do policije. Jer recimo, u dane praznika pet dana se ne radi, desi se krađa prvog dana, naši ljudi kad dođu peti, šesti dan primijete i onda ne znaju ni koliko je otuđeno i na koji način. Onda tu malo sporno i kad policija naknadno izađe. Al evo, moram reći da zaista u Varešu mi nemamo toliko toga koliko se dešava u drugim općinama Ze-Do kantona. I mislim da ovo nije, nije nekakav poseban problem. Policija to u svojoj nadležnosti, znači, rješava, evo, kad se, kad se dese te stvari. Vezano, evo samo da kratko kažem, ovo produženje oružanih listova. Ovo je bilo treće produženje koje je Skupština Ze-Do kantona donijela i obavještavam, evo, ovim putem i građane da više sigurno neće biti produženja. 23 hiljade oružanih listova u Ze-Do kantonu je zamijenjeno. Ostalo je još 4 hiljade građana da zamjene svoje oružane listove, legalno da posjeduju lovačko oružje, pištolje i tako dalje. Međutim, evo istaknuto je da je jedan od daleko većih problema nelegalno oružje koje se nalazi kod građana. Vi te informacije čujete, zaista toga ima dosta. Al evo jedan apel, znači, da građani u najkraćem roku do 30.06. izvrše zamjenu, svi oni koji to ne urade, evo Komandir je rekao, bit će im oduzeto, dobit će prijave i to je jedna ovako malo gora varijanta. Zahvaljujem.

Predsjedavajući OV Zdravko Marošević:

Hvala zastupniku gospodinu Fahrudinu Brkiću. Ima li još neko po ovome? Kol'ko vidim da nema. Prije izjašnjavanja, Safeta, da li ostajete pri traženju stanke? Pet minuta, pet minuta stanaka.

Pauza .....

Nastavljeno je sa radom sjednice.

Predsjedavajući OV Zdravko Marošević:

Molim vas, zauzmite svoja mjesta. Idemo sa radom sjednice. Poslije stanke da li predlagač, koji je predložio stanku, molim vas..., ispred SBB-a je predložena stanaka. Da li imate još nešto dodatno reći po ovo točki dnevnog reda? Ako nema, imal' još neko za raspravu prije nego što zaključim? Da mogu predložiti zaključak. Nema. Evo na osnovu vaše rasprave, kako što sam već i rekao, nadam se da je Policijska stanica i da smo mi svi, i da je javnost čula, znači, da možemo biti uglavnom zadovoljni, ali svakako treba uzeti u obzir sve vaše primjedbe i sugestije i da Izvještaji koji se podnose ka znanju, da oni zaista budu opširni, ne radi samo nas, nego radi šire javnosti, jer to građane interesuje radi sigurnosti. I zato predlažem zaključak Općinskom vijeću, da prima ka znanju Izvještaj o radu Policijske stanice Vareš za 2013. godinu uz preporuke, dakle od strane vijećnika, i da se iste uzmu u njihovo razmatranje i njihov rad, da bi što bolje rješavali situaciju sigurnosti na području općine Vareš. I svakako pozivamo saradnju, a to policija radi redovno, sve građane da čvrsto, znači saraduju sa Policijskom stanicom u interesu sigurnosti. Znači, to je ono što je generalna poruka trebala biti i odavde. I nadamo se da će u ovoj 2014. se isto daleko bolje biti nego u 2013. Evo sa ovakvim zaključkom što sam rekao, ja predlažem da primimo k znanju i usvojimo ovaj zaključak. Ko je za?..... Imal' neko protiv? ..... Dva. Suzdržan? Dva, tri. Tri, dva, pet. Konstatiram da je ovaj zaključak i ovo Izvješće primljeno ka znanju. Zahvaljujem se Policijskoj stanici na učestvovanju u raspravi. I vidimo se neki drugi puta.

*(Rezultati glasanja: 14 glasova „ZA“, 2 glasa „PROTIV“ i 3 „SUZDRŽANA“ glasa.)*

## **Ad. 10.**

*(Izveštaj o realizaciji Programa rada  
Općinskog vijeća Vareš za 2013. godinu. )*

Sekretar OV Leon Pavlović u svom izlaganju dao je pozitivne komentare na rad Općinskog vijeća, te naglasio da u narednom periodu treba veći akcenat staviti na rad stalnih radnih tijela u OV.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Izveštaj o realizaciji Programa rada Općinskog vijeća Vareš za 2013. godinu.

Nakon izjašnjavanja vijećnika predsjedavajući OV konstatuje da je **jednoglasno usvojen**

***Izveštaj o realizaciji Programa rada  
Općinskog vijeća Vareš za 2013. godinu.)***

Predsjedavajući OV dao je pauzu u trajanju od 15 minuta.

Nastavljeno je sa radom sjednice.

## **Ad. 11.**

*(Tekuća pitanja.)*

1. Predsjedavajući OV upoznao je Vijeće sa Rezolucijom o zaštiti prava djece na obrazovanje iz Konjević Polja broj: 01-01-3-27/14, koju je Općinsko vijeće Olovo donijelo na 14. redovnoj sjednici održanoj 31.12.2013. godine.

Predsjedavajući OV predložio je Vijeću i stavio na izjašnjavanje slijedeći

### **Zaključak:**

- **Vijeće podržava Rezoluciju o zaštiti prava djece iz Konjević Polja u tekstu kakav je usvojilo Općinsko vijeće Olovo na 14. sjednici održanoj 31.12.2013. godine, broj: 01-01-3-27/14 od 31.12.2013. godine.**

Nakon izjašnjavanja vijećnika predsjedavajući OV konstatuje da **je jednoglasno usvojen predloženi Zaključak.**

2. Predsjedavajući OV upoznao je Vijeće sa dopisom-ponovnom Urgencijom MZ Ravne podružnica Zubeta koju je Stručna služba OV zaprimila 17.01.2014. godine, a odnosi se na problem održavanja vodovoda podružnice Zubeta. U prilogu dopisa dostavljen je i spisak sa potpisima građana.

Otvorena je rasprava u kojoj su učestvovali vijećnici: Elvir Rožajac, Jasmin Salketić, Ismet Abdulahović, Kenan Kamenjaš, predsjedavajući OV Zdravko Marošević i Općinski načelnik Kovačević Avdija koji je upoznao prisutne da je predsjednik MZ Ravne odazvao se pozivu za prisustvo na današnjoj sjednici, ali da nije bilo potrebe da ostaje na istoj. U daljem izlaganju, Općinski načelnik podsjetio je prisutne da je ovakav dopis sa identičnim spisakom, prošle godine razmatralo Vijeće. Na osnovu tog

dopisa zadužen je Općinski načelnik da zajedno sa nadležnom Službom i direktorom JKP d.o.o. Vareš održi sastanak sa Savjetom mjesne zajednice, što je i učinjeno. Svi zaključci i obaveze iz prethodnog dopisa su završeni na najbolji mogući način. Kompletna dokumentacija postoji da je završetkom infrastrukturnog objekta, uz prethodnu suglasnost Savjeta MZ i većine zbora građana MZ Ravne i Zubeta, objekat predat na upravljanje JKP d.o.o. Vareš. U vezi s tim, Općinski načelnik predložio je da Vijeće dopis-urgenciju MZ Ravne arhivira i primi k znanju.

Zaključena je rasprava i predsjedavajući OV predložio je slijedeći

#### **Zaključak:**

- **Građani svih mjesnih zajednica općine Vareš koji su legalno izabrali organe, moraju sve svoje probleme rješavati u sastavu i okviru Zakona koji su u nadležnosti mjesne zajednice i samo legalni predstavnici mjesnih zajednica sa takvim problemima mogu dolaziti da rješavaju probleme pred organima vlasti, - Općinskim vijećem i Općinskim načelnikom.**

Nakon izjašnjavanja vijećnika predsjedavajući OV konstatuje da je sa **18 glasova „ZA“ i 1 glasom „PROTIV“ usvojen predloženi Zaključak.**

3. Predsjedavajući OV upoznao je prisutne sa Žalbom gosp. Fatić Saliha, Budoželje bb od 22.01.2014. godine, koja je upućena i direktoru JU Dom zdravlja Vareš, a odnosi se na liječenje djeteta.

Za riječ se javio Općinski načelnik koji je upoznao prisutne sa pokrenutim aktivnostima u vezi dostavljene Žalbe, te je iznio lično mišljenje da Vijeće, na osnovu Žalbe gosp. Saliha Fatić, treba uputiti, generalno menadžmentu JU Dom zdravlja Vareš, dopis u kome bi se navelo da je učinjen nekorektan postupak.

Za riječ se javio vijećnik Emir Islamović koji je zamoljen ispred MZ Budoželje da traži pismeno očitovanje od JU Dom zdravlja Vareš i obrazloži svoj propust u vezi nastalog problema navedenog u Žalbi, te da li je pokrenut ikakav postupak zbog propusta.

Predsjedavajući OV, na osnovu diskusije po Žalbi, predložio je slijedeći

#### **Zaključak:**

- **Vijeće traži od menadžmenta JU Dom zdravlja Vareš da se pismeno očituje po žalbi Fatić Saliha iz Budoželja i da utvrdi gdje je nastao propust. Sa očitovanjem JU Dom zdravlja Vareš upoznati Vijeće i podnosioca žalbe.**

Nakon izjašnjavanja vijećnika predsjedavajući OV konstatuje da je **jednoglasno usvojen predloženi Zaključak.**

4. Predsjedavajući OV upoznao je prisutne sa dopisom-molbom za umanjenje komunalne takse za taxi prevoznike od 13.01.2013. godine i dopisom-prigovorom na Odluku Općinskog vijeća Vareš o povećanju visine komunalne takse, dostavljenom od strane D.O.O „PEZO“ Vareš od 27.01.2014. godine.

Otvorena je rasprava u kojoj su svoja mišljenja, sugestije i prijedloge iznijeli vijećnici: Zdravko Barkić, Elvir Rožajac, Mario Mirčić, Nikola Šimić, Almir Ćiriković, predsjedavajući OV Zdravko Marošević i Općinski načelnik Kovačević Avdija.

Predsjedavajući OV je na osnovu diskusije i prijedloga iznesenih u raspravi predložio slijedeći

#### **Zaključak:**

- **Zadužuje se Jedinствeni općinski organ i Općinski načelnik da zajedno sa nadležnom Stručnom službom i Poreznom upravom Vareš napravi cjelovitu analizu i preispita metodologiju za narednu godinu, a vezano za plaćanje naknade za komunalnu taksu, gdje bi se kao komparacija uzele slične općine koje imaju ovakve ili iste probleme kao što ih mi imamo, da se vidi da li ima prostora da se nešto uradi u smislu diferencijacije i da li postoji zakonska mogućnost da se određene naknade, uz prethodno sklopljene ugovore, izvrše u ratama. Nacrt Odluke o komunalnim taksama dostaviti Vijeću na razmatranje do septembra mjeseca tekuće godine.**

Zadužuje se nadležna Služba da podnosiocima molbe i prigovora pismeno obavijeste o donesenom Zaključku.

Nakon izjašnjavanja vijećnika predsjedavajući OV konstatuje da je **jednoglasno usvojen predloženi Zaključak.**

5. Predsjedavajući OV upoznao je prisutne sa Obavijesti o zaključcima sa 9. sjednice Povjerenstva za izbjeglice i raseljene osobe BiH, broj: 06-50-286/14NS-62 od 23.01.2014. godine, u kojoj nas obavještavaju da su Odlukom Povjerenstva, broj: K-10-1-50-4752/14 od 15.01.2014. godine, odobrena sredstva u iznosu od 95.000 KM za izgradnju lokalnog puta Lovački-Očevija.

6. Predsjedavajući OV informisao je prisutne o Ugovoru o angažovanju specijalnog vozila za odvoz smeća koji je zaključen između Općine Vareš i Općine Breza.

U raspravi su učestvovali vijećnici: Elvir Rožajac, Zdravko Barkić, Ismet Abdulahović, Mario Mirčić, Nikola Šimić, predsjedavajući OV Zdravko Marošević i Općinski načelnik koji je dao dodatne informacije vezano za Ugovor i odgovorio na neka pitanja vijećnika postavljena u raspravi.

Predsjedavajući OV je na osnovu rasprave predložio Vijeću da primi k znanju ovu informaciju i da

- **Vijeće daje podršku Općinskom načelniku da u skladu sa finansijskim mogućnostima postavi video nadzor na deponiji „Kota“.**

Nakon izjašnjavanja vijećnika predsjedavajući OV konstatuje da je **prijedlog jednoglasno usvojen.**

7. Predsjedavajući OV upoznao je prisutne sa Informacijom dostavljenom od strane JKP d.o.o. Vareš, broj: 39-01/14 od 20.01.2014. godine u kojoj Vijeće informišu i ukazuju na štetne posljedice koje će se odraziti na finansijsku nelikvidnost preduzeća i njegovo poslovanje u cjelini, zbog neusvajanja „Nacrta Odluke o utvrđivanju cijena komunalnih usluga i visine naknade za priključno mjesto“, na 14. sjednici OV Vareš održanoj 23.12.2013. godine.

Otvorena je rasprava u kojoj su učestvovali vijećnici: Elvir Rožajac, Zdravko Barkić, predsjedavajući OV Zdravko Marošević i Općinski načelnik Kovačević Avdija.

Predsjedavajući OV, na osnovu diskusije i iznesenih prijedloga u raspravi, predložio je slijedeći

#### **Zaključak:**

- **Zadužuje se Općinski načelnik da formira Radnu grupu na čijem čelu će biti gosp. Senad Mahmutović, pored njega u sastavu će biti gosp. Zdravko Barkić, gosp. Safeta Muftić i gosp. Boško Andrić, koja će u roku od 60 dana u dogovoru sa menadžmentom i organima upravljanja JKP d.o.o. Vareš, uvažavajući sve izneseno u raspravi od strane vijećnika vođene po Informaciji JKP d.o.o. Vareš, broj: 39-01/14 od 20.01.2014. godine, uraditi i dostaviti Vijeću detaljnu Informaciju o realnim kalkulativnim cijenama komunalnih usluga, odnosno o problemima koji se Općini Vareš prezentuju kao posljedica nečega što je nastalo 2010. godine odnosno 2008. godine.**

Informaciju dostaviti Vijeću na sjednici koja će se održati u mjesecu aprilu tekuće godine.

Nakon izjašnjavanja vijećnika predsjedavajući OV konstatuje da je **jednoglasno usvojen predloženi Zaključak.**

8. Vijećnik Mario Mirčić u skladu sa Poslovníkom o radu Općinskog vijeća Vareš, predložio je Vijeću Inicijativu za osnivanje Ureda za projekte, njihovu realizaciju i provođenje do samog oživljavanja, o čemu je dao i obrazloženje.

Predsjedavajući OV stavio je na izjašnjavanje predloženu Inicijativu i nakon izjašnjavanja vijećnika konstatuje da je **sa 18 glasova „ZA“ i 1 „SUZDRŽANIM“ glasom usvojena**

***Inicijativa za osnivanje Ureda za projekte,  
njihovu realizaciju i provođenje do samog oživljavanja.***

9. Vijećnik Mario Mirčić predložio je Vijeću da se sugeriše Javnim ustanovama i institucijama da za iduću grejnu sezonu iznađu mogućnost u rješavanju problema koji se odnosi na dimnjake, odnosno dim i ogromnu čađ koja izlazi iz njih.

Sastavni dio ovog Zapisnika je audio zapis sjednice.

Sjednica je završena u 20,00 sati.

**SEKRETAR**

**Leon Pavlović**

**ZAPISNIČAR**

**Azra Ibrahimović**

**PREDSJEDAVALAČI**

**Zdravko Marošević**